

Tantiago

cadota ante nänö yewæmongainta

Tantiago iïmaï yewæmongacäïmpa

1 ¹Botö Tantiagobo iñömö Mæmpo Wængonguï tönö mönö Awënë Itota Codito inate nē cædömo ïmpa. Idægoidi mïni cabo tipæmpoga go mencabomïniya inte wabæca nāni quëwencabo wabæca nāni quëwencabo weca pangocæte godimïni iñöminite botö waa pönëmo inte iï yewæmöintaa yewæmömopa.

Wængonguï nänö ëñëmämo ante mönö ængæïmpa, ante

²Botö tönïñamïni ëñëedäni. Quiëmë beyæ wæwente bamïni incæ mïnitö æyedëmë mänömaï bamïni ïninqe edæ mänïñedë incæ cöwë, Mönö watapæ toquinque ïmpa, ante pönëedäni. ³Mïni wede pönënö æbänö i, ante edonque acæïmpa, ante cædäni ate caate wæmïni incæte mïnitö, Mönö caate wædö beyænque mönö godömenque pædinque wæntæye inämaï inte ee cæquïmö ïmoppa, ante do ëñëmïnipa.

⁴Ïninqe, Mönö æmæwo pæcæïmpa, ante cædinque mïnitö wæntæye inämaï inte ee cæedäni. Mänömaï cæte pæmïni ïninqe, Mïni cædimämo æbänö cæmïni imïni, ante adinqe edæ, Tömänö waëmö cæmïni imïnipa, ante abaiïmpa.

⁵Mïnitö weca æcänö nänö ëñëmämo wïi eyepæ ina adinqe tömengä, Pönömi ëñëmoe, ante Wængonguï ingante apænequëngampä. Apæneyongä Wængonguï wæætë pönö cæcä æncæcäïmpa. Edæ Wængonguï iñömö nē, Pönömi æmoe, ante änongä ingante wæætë piïnte änämaï inte

godönongä ingampa. Ayæ tömänäni inänite pönö cædinque tömäa godönongä ingampa. ⁶Ïñæmpa nē angä iñömö wede pönenguëngä inte wïi æmæ pönëninque apæneccæcäïmpa. Edæ nē æmæ pönengä iñömö gäwapæ æpæ woboyæ pæmæninque mä conta mä conta gopæ ocæmä pö cæpæ nänö cægaïmä bai tömengä adobaï gocä ingampa. ⁷Mäningä iñömö Wængonguï pönongä æncæboïmpa, ante ædö cæte iïmaï ante pönëuingäa. Wængonguï edæ tömengä ingante tömäa godönämaï incæcäïmpa. ⁸Tömengä mënongä pönente quëwengä ingampa. Æbänö cæcäa, ante ëñënämaï inongä inte ædö cæte waa cæquingäa.

⁹Adocanque mönö tönïñacä incæ ïmæca quëwënäni nāni ëadincoo nē wïi eyepæ ëacä incæte tömengä Wængonguï pönö cæcä beyænque, Æbänö ëaboo, ante pönëninque watapæ toquëngä ingampa. ¹⁰Wacä mönö tönïñacä guiquënë ïmæca quëwënäni nāni ëadincoo nē ëacä incæte tömengä wæætë, Botö önömoque ïmpa, ante pönëninque watapæ toquëngä ingampa. Edæ ongai önonque pododinqe guïñë wæmpa bai tömengä adobaï wæncæcäïmpa. ¹¹Edæ nænque tamö tï näwäñonte awæ guingo icate to aminte æmæwo wæmpa. Ongai yædoï gæuo odote wæninqe nänö waëmö ënodï wo ëwente bapa bai nē ëacä iñömö adobaï ingampa. Tömengä godonte æ godonte æ tæcæ cædinque quingæ wænique edæ dæ anguingä.

Mönö caate wæpāmo

¹²Wængonguī ingante nē waadedāni inānite tōmengā wæætē, Mini cōwē quēwenguīnta, ante poganta bai mīnitō imīnite pōnōmo æncæmīnīmpa, ante angacāīmpa. Mānīnta Wængonguī weca cōwē mōnō quēwenguīnō impa. Īnīnque waocā caate wæcā incæte tōmengā wæntæye badāmaī ingā ĩñōmō tōmengā nānō toquinque. Wæntæye ināmaī inte ee cæcā adīnque Wængonguī, Mīni cōwē quēwenguīnta, ante tōmengā nānō angaiñō bai māningā ingante pōnongā æncæcāīmpa. ¹³Waocā nānō cæinēwente wædō beyæ, Wēnæ wēnæ cæboe, ante cædīnque tōmengā, Wængonguī botō imote, Wēnæ wēnæ cæcæbiīmpa, ante ingampa, ante wīī anguēnengā ingampa. Edæ Wængonguī ingante, Wēnæ wēnæ cæcæbiīmpa, ante waocā ædō cæte anguingā. Wængonguī wæætē wadāni inānite, Wēnæ wēnæ cæcæmīnīmpa, ante ānāmaī ĩnongā ingampa cæmīnī. ¹⁴Æcāmenque incæ, Wēnæ wēnæ botō cæinente wædō incæ ante wæmō impa, ante pōnēnīnque tōmengā do wēnæ wēnæ mōnō cæinente wædō beyænque wēnæ wēnæ cæinengā ingampa. ¹⁵Yædēmadā wēñængā pæcā adīnque ēñāquīngā bai mōnō cæinēwente wæpāmo adobaī entawente pætawēmō ĩnīnque mōnō do wēnæ wēnæ cæmōmpa. Ayæ wēnæ wēnæ mōnō cæpāmo beyæ mōnō æmæwo wænguīnque impa.

¹⁶Botō nē waadete tōñīñamīni ēñēedāni. Mīnitō nāmā incæ oda cædāmaī incæmīnīmpa. ¹⁷Ōnonque mōnō ænō ante mōnō wæmō ñāō ēmōnoncoo tōmancoo incæ mōnō Mæmpo Wængonguī ōñædē owote nē pōnōnongā ingampa. Mæmpo Wængonguī ōñædē owodīnque apāidāni ĩñāni badongacāīmpa. Adocā nænque wēmō cæbaī wayōmō wayōmō go bai entawēnāmaingā ingampa. Tōmengā wæætē adodonque ingaingā ingampa. ¹⁸Botō cæinēmōpa, ante nē angaingā inte Wængonguī, Nāwangā botō angaiñō beyænque mīnitō botō

wēñæmīni bacæmīnīmpa, ante wāānā mangā bai cædīnque mōnō imonte pōnō badongacāīmpa. Tōmengā nānō badongaincoo tōmancoo ĩñonte mōnō tānomō ĩñōmō imōmpa.

Wængonguī ingante mōnō nō ēñente cædō

¹⁹Botō nē waadete tōñīñamīni ēñēedāni. Wacā āñongā mīnitō tōmāmīni quīngæ ēñenguēñēmīni ĩmīnīpa. Mīnitō wæætē quīngæ apānedāmaī inte adobaī quīngæ pīinte ināmaī ĩnguēñēmīni ĩmīnīpa. ²⁰Wængonguī, Nō cæte quēwēedāni, ante waa nānō cæinēmāmo ante waocā nānō pīīmāmo beyæ wīī edæ cæcampa. ²¹Mānōmaī beyæ mīnitō wentamō entawēnīnque mīni wīwa cædō tōmāā ñīmpo cæedāni. Adobaī quīēmē mīni wēnæ wēnæ cæpāmo tōmāmāmo ñīmpo cæte ĩedāni. Ayæ Wængonguī nānō angaiñō ante mīnitō mīmōñē nānō mingaiñō ante Ao ante gāñē pōnente æncæmīnīmpa. Edæ ĩ angaiñō beyænque mīnitō quēwencæmīnīmpa.

²²Mīnitō, Nāmā incæ oda cædāmaī ĩngāīmpa, ante cædīnque Wængonguī nānō angaiñō ante wīī ōnonque ēñēmīnīnque inte wæætē, Æbānō ante ĩ, ante ēñente cæedāni. ²³⁻²⁴Waocā nāmā awīnca awocawēntaa adīnque nāmā ate ate wadæ godīnque, Quīnō bai intawo, ante nānō adīnca do oda cæte wæcampa. Mānōmaī oda cæte wæcā bai Wængonguī nānō angaiñō ante nē ēñenganque wīī ēñente cæcā ĩñōmō tōmengā adobaī oda cæte wæcā ĩngampa. ²⁵Wængonguī nōīngā nānō wææ angaiñō ante nāni yewæmongaiñō ante nē ædæmō cōwē acā guīquēñē tōmengā ĩñōmō nānō ēñēñīnō ante wīī pōnente badāmaī inte wæætē cōwē ēñente cæcā ĩnīnque tōmengā māñōmaī cædīnque nānō toquinque cæcampa. Wængonguī nōīngā nānō wææ angaiñō beyænque waocā ñīmpo cæte quēwengā ĩngampa.

²⁶Wængonguī ingante botō nē ēñente cæbo imōpa, ante pōnengā incæte

tömengä önonguënewa ñä cæguënewate bai cädämaï inte wæætë wiwa tedecä inique tömengä nämä incæ oda cæte gobaingampa. Ayæ Wængongui ingante botö ëñente cæbo imopa, ante tömengä nänö änö ante önonque angä imaingampa. ²⁷Nöwadäni tönö owæmpoinäni näni wæwëñedë mönö tömënanäni tönö godongämæ cæcæimpa. Ayæ adobai imæcaque ante quëwënäni näni wënæ wënæ cædimämo bai mönö, Wentamö badämaï ingæimpa, ante wææ cæcæimpa. Mänömaï cæmö iniquante mönö Mæmpo Wængongui ayongante mönö wapiticæ cädämaï inte wæætë nö ëñente cæmö imopa.

Wacä ingante wadö wadö ate pönente cädämaï ingæimpa

2 ¹Botö töninämäni ëñëedäni. Mönö Awënë Itota Codito ñäö ëmonte nê apäigaingä ingante nê pönëmïni inte waodäni inänite wadö wadö ate pönente cädämaï iedäni. ²Iïmaï näni cæbai ante önöwënenque pönëedäni. Edæ onguinængä nê ëacä inömö tömengä nänö önongompo timpoi oodo badöi wempocä inique waëmoncoo mongængä inte mïni a ongönömö guï pongampa. Ayæ onguinængä nê wii eyepæ ëacä inömö pedæncoo mongængä inte mïni a ongönömö adobai pongampa. ³Adinque mïnitö waëmoncoo mongængä ingante, “Bitö inömö waa tæ contaïmpaa tæ contæ,” ante apænemïni imïnitawo. Wæætë wii eyepæ ëacä ingante, “Bitö mäninömö adiyæ ongö. Botö önöwa inömö tepataa tæ contæ,” ante apænemïni imïnitawo. ⁴Mänömaï apænëdinque mïnitö weca wii godongämæ wadö wadö ate pönente cæbaïmïnitawo. Ayæ wënæ wënæ pönëninque apænte ämïni babaimïnitawo.

⁵Botö nê waadete töninämäni ëñëedäni. Wængongui Awënë Odeye ingante nê waadedäni inänite tömengä, Botö pönö cæbo ate mïnitö botö nempo cöwë quëwencämïnimpa, angacäimpa. Imæca quëwënäni weca mäincoo wii

eyepæ ëadäni inönänite tömengä, Mïni wede pönënö nanguï ëwocadinque mïnitö botö angainö bai botö nempo quëwencämïnimpa, ante tömënanäni inänite wii apænte ængantawo. ⁶Mïnitö wæætë wii eyepæ ëacä ingante pïinte tedemïni ate tömengä guingo imonte badingä ingampa. Inæmpa nê ëadäni guiquëñë mïnitö imïnite näni wënæ wënæ cædinö beyænque wii wämïnitawo. Ayæ adodäni mïnitö imïnite apænte angüñäni weca godoncæte ante wii ænte godänitawo. ⁷Ayæ mïnitö, Coditoidi imönipa, ante Codito waa pönï ëmöwo ante ëmömïni inömïnite tömënanäni adodäni incæ mäniwo ante babæ äninque nê wënæ wënæ änäni wii inänitawo.

⁸Wængongui angä ëñëninque näni yewæmongainö ante adinque mïnitö waa pönï Awënë nänö wææ angainö ante nö ëñente cæmïni inique waa cæbaïmïni imïnipa. Iïmaï ante yewæmonte impa. “Bitö nämä ante pönente, Nämä waadebo imopa, ante nämä bitö waadete pönenganca wadäni inänite adonganca waadete pönëe.”

⁹Mänömaï cædinque mïnitö mäincoo ëacä ingante waa cæmïni incæte wii eyepæ ëacä ingante wadö wadö ate pönëmïni inte wiwa ämïni inique wënæ wënæ cæmïni imaimïnipa. Ayæ Wængongui nänö wææ angainö önonque wido cæte bai cædimïni inte mïnitö wentamö mongæmïni imaimïnipa.

¹⁰Wængongui beyæ Möitee wodi nänö wææ yewæmongainö ante tömänö ante æcämënte nê ëñente cæcä incæte mäninö adodonque pönï incæ ëñënamäi cæcä inte tömengä mäninö tömänö ante önonque wido cæte bai cædingä inte wentamö mongængä ingampa.

¹¹Edæ Wængongui, “Nänöogæ inämaï inongante godö guëa mönämaï iedäni,” ante nê angaingä inte tömengä adocä godömenque iïmaï angacäimpa, “Wacä ingä wænönämaï iedäni.” Mïnitö wacä nänöogæ inongante godö guëa mönämaï imïni incæte wacä ingante wænömïni inique mïnitö Wængongui nänö

wææ angainō ōnonque wido cæte bai cædimīni inte wentamō mongæmīni imaimīnipa.

¹²Wængonguī nānō apænte anguiōnæ mōnō imonte tōmengā nānō wææ angainō bai cæcæcāimpa. Mānīnō nānō wææ angainō beyænque waocā űimpo cæte quēwengā ingampa. Īnīnque mīnitō tedemīni incæ cæmīni incæ, Cōwē mānōmaī impa, ante pōnēnīnque tedecæmīnīmpa. Adobai ante cæcæmīnīmpa. ¹³Wadāni wæwēnāni īñōnānite æcāmenque wīī waadete godō waa cædingā ingāā, ante Wængonguī wæætē tōmengā ingante godō waadete waa cædāmaī inte apænte ānīnque pancæcāimpa. Wadāni wæwēnāni īnānite æcāmenque guiquēnē nē godō waadete waa cædingā īñongante Wængonguī wæætē tōmengā ingante nānō apænte anguiōnæ godō waadete waa cæcæcāimpa.

**Wængonguī ingante pōnēnīnque
mōnō cæquēnēnō**

¹⁴Botō tōnīnāmīni ēñēedāni. Waocā, Botō Wængonguī ingante wede pōnēmo īmopa, angā incæte tōmengā nānō waa cædinō wæætē dæ ā īnīnque tōmengā mānīnō, Wede pōnēmopa, ante nānō ānō beyænque ædō cæte wænāmaī quēwenguīngāā. ¹⁵Īīmaī nāni cæbai ante ōnōwēnenque pōnēedāni. Wængonguī ingante wede pōnengā īñōmō onguiñængā incæ onquiængā incæ æcāmenque incæ tōmengā weocoo tōnō cænguī ōmaacā ingampa, ¹⁶adinque mīnitō weca adocanque tōmengā ingante, “Waa goe, āmopa. Bitō, Yoguidāmaī, ante weocoo wēñæ, cænguī eyepæ ænīnque cæe,” ante angā incæte nē ōmaacā nānō ænguēnēnō ante edæ tōmengā ingante godōnāmaī īnīnque tōmengā waa cæcantawogaa. ¹⁷Adobai īīmaī impa. Mōnō waa cædinō dæ ā īnīnque Wængonguī ingante mōnō wede pōnēnō incæ ōnonque bapa.

¹⁸Incæte wacā īīmaī anguingā. “Bitō Wængonguī ingante tōmēmi wede pōnēnō ēabi īmipa. Botō guiquēnē

tōmēmo waa cædinō ēabo īmopa,” ante āñongā botō wæætē, Bitō nē cædāmaī īnōmi inte Wængonguī ingante bitō wede pōnēnō ante botō īmote odōmōmi aboe, āmopa. Odōmōmi adīnque botō guiquēnē botō cædinō ante odōmōmo adīnque bitō wæætē botō wede pōnēnō edonque pōnī abaīmīpa. ¹⁹Wængonguī nāwangā adocanque ingaingā ingampa. Bitō mānōmaīnō ante pōnēmi inte waa pōnī pōnēmi īmīpa. Wēnæidi diyæ adodō ante pōnēnānīpa tōō. Incæte ancai guīñente do do wāate wædānīpa. ²⁰Bitō mānōmaīnō ante nē ōnonque tedebi īmi ēñēe. Botō, Mōnō waa cædāmaī īmō īnīnque Wængonguī ingante mōnō wede pōnēnō incæ ōnonque īmaīmpa, ante odōmōmo ate bitō edæ Ao ante ēñenguīmīyaa. ²¹Edæ mōnō docā Abadāō wodi Wængonguī nānō āmaī cædinque tōmengā wengā onguiñængā Itæca ingante ænīnque iya tāīmoga cōnōnīnque wænoncæ cæyongante Wængonguī adīnque, Bitō nō cæte entawēmi āmopa, ante apænægacāimpa. Abadāō wodi nānō cædinō beyænque Wængonguī mānōmaī angacāimpa. ²²Bitō ēñēnāmaī īmitawo. Abadāō wodi edæ Wængonguī ingante wede pōnēnīnque ēñente cægacāimpa. Wīī ēñente cægaingā inte bai tōmengā Wængonguī ingante nānō wede pōnengāinō ōnonque pōnēmaingā incægacāimpa. Ayæ waa nānō cægaīnō beyæ Abadāō wodi nānō wede pōnengāinō eyepæ pōnī bagatīmpa. ²³Wængonguī angā ēñente nāni yewæmongāinō bai īinque batīmpa. Īīmaī ante impa. “Abadāō īñōmō Wængonguī, Botō īīmaī pōnō cæcæboīmpa, ante nānō angāinō ante pōnengacāimpa. Īnīnque Wængonguī, Mānōmaī pōnēmi beyæ bitō botō ayōmo nō cæte entawēmi īmīpa,” ante tōmengā ingante wæætē pōnō angacāimpa. Ayæ Abadāō, Wængonguī æmīgo ingampa, ante angadānīmpa.

²⁴Bitō ēñēnāmaī īmitawo. Waocā Wængonguī ingante wīī nānō wede pōnēnō beyænque wæætē, Tōmengā

æbänö waa cæcää, ante adinque Wængonguī tōmengä ingante, Bitō nō cæte entawēmi abopa, ante cæcä ingampa. ²⁵Idægoidi, Ōmæ awēmō ate pōeda, ante mēnaa inate da godönāni gote pōñōnate Adacaba wodi nē towente quēwengä incæ, Botō oncönē guieda, ante tōmēna inate wē wodongacäimpa. Ayæ, Wadāni tōmēna inate bæi ongönāmai incædänimpa, ante, Wadō taadō goeda, ante da godongä gogadäimpa. Mänōmai cæcä adinque Wængonguī, Bitō cædinō beyænque bitō botō ayōmo nō cæte entawēmi imipa, ante Adacaba ingante adobainō ante pönō angacäimpa. ²⁶Mönö baō ömæwocacä inte do wænte ī bai Wængonguī ingante mönō waa cædāmai wede pönēnō adobaī do wæningä bai inte edæ önonque impa.

Mönö önonguēnēwa

3 ¹Botō tōniñamini ēñēdāni. Minitō weca wīi tæiyænāni, Nē odōmonte apænemōni bacämōnimpa, ante baineinte wæquēnēnāni incædänimpa. Edæ wadāni inānite pönōmenque apænte äninque Wængonguī wæætē mönō nē odōmonte apænemō iñōmonte, Æbänö odōmonte apænemīni, ante mönō imonte godōmenque apænte äninque pancæcäimpa. Minitō do ēñēmīnīpa. ²Mönö tōmāmō nanguī ægodawate tæi go wæninque bai oda cæmō imompa. Nē tedecä iñōmō tōmengä, Æbänö ante tedeboo, ante tōmengä önonguēnēwa cōwē wææ aadinque tōmengä wēnæ wēnæ änāmai ininque nöingä cæbaingä ingampa. Ayæ wēnæ wēnæ cædāmai incæboimpa, ante nāmā baonga tōmāo wææ aate quēwēnongä ingampa.

³Cabayo mönō imonte ēñente cæcæcäimpa, ante tæinta badōinta önōne da wēnemō ate, Cabayo baō tōmāñö incæ iñaimæ iñaimæ gocæcäimpa, ante cæmō ininque cabayo do ēñente gocampa. ⁴Iimainō ante ñænængade wipo ante adobaī ante pönēdāni. Ñænængade pōni

wipo incæ woboyæ nanguī pæmænte gopa incæte wipo nē dadongä nänö cæinēnō bai, Ædönö dadiimæ ædönö dadiimæ wiyate goquiī, ante guiyä awæmpa inte wiyate cæcä gopa. ⁵Ayæ adobaī mönō baō tōmāo ēñayōmō mönō önonguēnēwa guiyä enguēnēwamō imompa. Incæte mönō önonguēnēwa inte tededinque, Mönö nanguī cæmompā, ante tedewēmompā. Ñænængade pōni ömædē incæ amimō bayedē guiyä gonga beyæ ömædē tōmāo gonga bæcodote bapa. ⁶Ayæ mönō önonguēnēwa adobaī gonga bæcodote bai tedepa. Mönö baō tōmāo ēñayōmō mönō önonguēnēwa tōmāo mönō wiwa tedewenguinque wēnæ wēnæ enguēnēwamō imompa. Waomō incæ mäninguēnēwa beyænque mönō baō tōmāo inte ēñēnāmai cæmompā. Ayæ gonga wacæ tænōmonte bæcododāni bai ado önonguēnēwa beyæ mönō quēwenganca tōmanganca wo ewente imompa. Edæ iī gonga tadōmengadænguipodē öñonte ö ænte wacæ tænōmonte bæcodote bai cædinque wēnæ incæ mönō imonte cæcä beyænque mönō wiwa tedewēmo imompa.

⁷Babæidi incæ öömä ëadāni incæ tæntæidi incæ æpænē quēwēnāni incæ quingänōidi incæ tōmānāni inānite waocä, Botō pæpogate cænināni bacämīnīpa, ante cæcä ingampa. Waocä doyedē nänö cægāi beyænque cænināni bate quēwengadänimpa. ⁸Iñæmpa æcänö, Mönö önonguēnēwa pæpogate bai bacäimpa, ante cædaa edæ dæ angampa. Edæ, Babæidi cōwē incæmōnīpa, ante cænināni badāmai ināni bai mönō önonguēnēwa adobaī wēnæ wēnæ ī ininque ædō cæte waa tedemō. Wæætē mönō önonguēnēwa nanguī wænguimæ enguēnēwamō bai imompa.

⁹Mäninguēnēwa inte mönō Mæmpo Wængonguī ingante, Bitō tæiyæ waēmō imidō anguēnē, ante waa apænemompā. Wæætē waodāni Wængonguī tōmengä nänö ingāi bai nänö nē badongāināni iñönānite tōmēnāni inānite ante

mönö adoguënëwa inte wënæ wënæ apænemompa. ¹⁰Ado önöne incæ wæde wæde ante mënea ante apænemompa. Adodeque ante waa impa. Adodeque ante wënæ wënæ impa. Botö tönïñamini ëñeedäni. Mäninö bai mönö edæ wïi cæquënëmö ingæimpa. ¹¹Æpæ tayömö ado tayömö ædö cæte waëmömæ wentamömæ äänömonque ta goquimææ. ¹²Botö tönïñamini ëñeedäni. Iigowæ nani äwæ incayö odibomö nani änömö ædö cæte incaquïi. Yowewæ incayö ligo mäñeca ædö cæte incaquïi. Adobai ado tayömö ædö cæte waëmömæ wentamömæ äänömonque ta goquimææ.

Mönö nö ëñëmämo

¹³Minitö weca æcänö nö ëñengä ingantawo. Tömengä ïñömö, Nö ëñëmo ïmopa, ante wadäni ëñencädänimpa, ante cædinqe tömengä nänö waa quëwënö inte odömoncæcäimpa. Ayæ tömengä nö ëñengä incæ, Botö önömoque ïmopa, ante pönëninque tömengä nänö cædinö beyæ odömongä acädänimpa. ¹⁴Minitö guiquënë wacä quincöo adinqe piinte entawëmini ayæ nämanque ante, Mönö ñænæmö badinqe waa quëwengæimpa, ante pönente entawëmini ïninqe minitö nö ëñëmïni incæ, Mönö waa cæmompä, ante ædö cæte anguimïni. Ayæ mänömai bai godömenque entawëmini ïninqe näwangä mini anguënëno ante edæ Baa änämai iedäni. ¹⁵Mäninö ëñëmämo wïi Wængonguï nänö nö ëñëmämo ï. Wæætë ïi inguipogaque ante quëwengä inte waocä mä pönëninque wënæ nänö ëñëmämo ante entawengä ingampa. ¹⁶Edæ waocä æyedëmë wacä quincöo adinqe piinte entawengä ayæ nämanque ante, Botö ñænæmö badinqe waa quëwencæboimpa, ante pönente entawengä ïñömö tömengä ædö cæte töingä pönente cæcäa. Ìñæmpa quïëmë nani wënæ wënæ cæpämö ante cæcampä.

¹⁷Waocä Wængonguï nänö nö ëñëmämo ante në entawengä guiquënë waëmö entawengä ingampa. Ayæ wacä

ingante cöwë piyænë cæte quëwënongå ingampa. Tömengä në waadete pönengä inte wacä ingante waa ëñënongå ingampa. Wacä ingante ëñente cædongä ingampa. Tömengä, Wæwënämai incæbiimpa, ante wacä ingante godö waadete waa cædongä ingampa. Ayæ, Quïnö waa inguïi, ante mäninö ante cædongä ingampa. Në waodäni ïnänite wadö wadö ate pönente cædämai inte tömengä nö pönente quëwënongå ingampa. ¹⁸Wadäni ïnänite, Botö piyænë cæcæboimpa, ante në cæcä ïñömö tömengä nänö piyænë cædinö beyæ tömëmö në minongä bai ingampa. Tömengä nänö piyænë cædinö beyæ waodäni wæætë, Quïnö nö cæte impa, ante cædäni ïninqe tömengä edæ amiñayedë tömëmö tä pete ængä bai incæcäimpa.

Inguipoga nani quincöo ante pönënamai incæmöimpa

4 ¹Mini cabo quïnö beyæ ante guëa wæætëdö wæætë piininqe wæætë godö wæætë godö änewëminıtawo. Minitö nämä wadö wadö mini cæinënö ante entawente guëa cæte quëwëmini beyænque cöwë godongämæ mini piinte quëwënguinque ïminipa töö. ²Minitö æinente wæmïni incæte ænämai ïminipa. Ìninqe në ëacä ingante wänömïni incæ tömengä nänö quincöo ante æinëmini incæte mini æinënö, ante ænämai ïminipa. Mänömai beyæ minitö wæætë godö wæætë godö änewëninque guëa wæætëdö wæætë piininqe guëadö guëa cæte quëwëmini ïminipa. Mini äno ante minitö, Pönömi æmönïe, ante minitö Wængonguï ingante apænedämai ïmini inte mini ænämai quëwënguinque impa. ³Minitö Wængonguï ingante mini äno ante apænemïni incæte wënæ wënæ ante pönëninque apænemïni beyæ ænämai ïminipa. Edæ Wængonguï nänö pönönï æninqe mönö edæ nämanque pönente tote quëwengæimpa, ante æinente wæmïni inte ænämai ïminipa töö.

⁴Waocä nänöogæ ingante wido cæcä bai minitö adobai Wængonguï

ingante wido cæmīni imīnīpa. Mīnitō ēñēnāmaī imīnitawo. Inguipoga nāni quincoo ante mōnō pōnēnō beyæ mōnō Wængonguī ingante piinte imompa. Incæte, Inguipoga nāni quincoo ante nē pōnencæboimpa, ante æcānō angā Wængonguī ingante piinte bacæcāimpa. ⁵Wængonguī angā ēñēnīnque nāni yewæmongainō iīmaī ante ōnonquedō ante intawogaa. “Wængonguī cæcā beyænque mōnō tōmengā Ōnōwoca ingante ewocate quēwēmō imompa. Īnīnque mānīwoca mōnō imonte waadete pōnēnīnque, Botō imote waadete pōnenguēñēmīni imīnīpa, ante wæætē edæ godō piinte acā ingampa.” ⁶Incæte tōmengā mōnō imonte godōmenque waadete pōnō cædinque mōnō tōnō godongāmæ cædongā ingampa. Mānōmaī beyæ Wængonguī angā ēñēnte nāni yewæmongainō iīmaī ante impa. “Nāmanque ante, Mōnitō gomonga waa cæmōni imōnīpa, ante nē pōnēnāni inānite Wængonguī Baa angampa. Wæætē edæ, Mōnitō ōnōmōnīque baī imōnīpa, ante nē ānāni inānite tōmengā pōnō waadete cæcampa.”

⁷Mānōmaī beyæ mīnitō Wængonguī ingante ēñēnte cædāni. Wēnæ ingante Baa ante quēwēedāni. Baa āmīni ĩnīnque tōmengā nānēnē wodii wīnōmaingampa. ⁸Wængonguī gāmænō pōedāni. Pōmīni ate tōmengā wæætē mīnitō weca poncæcāimpa. Mīnitō wēnæ wēnæ cæmīni ĩnōmīni inte ōnompō mēmpote baī waēmō pōnī quēwēedāni. Ayæ, Wængonguī ingante waadete pōnēmopa, ante āmīni incæ adobaī inguipoga nāni quincoo pōnēmīni inte mīnitō mēnonga ante pōnente quēwēnōmīni imīnīpa. Īnīnque edæ mīmō nā mēnongate baī cædinque tōingā pōnente entawēmīni baedāni. ⁹Mīni nāmā wēnæ wēnæ cædinō ante pōnēnīnque mīnitō, Ancaa wæwente awædō, ante wæedāni. Mīnitō Ca ca tote quēwēnō nīmpo cædinque Ca ca wædinque edæ wæwente quēwēedāni. ¹⁰Mīnitō incæ, Wēnæ wēnæ cæmōnīpa, ante ōnōmōnīque imōnīpa, ante

Wængonguī ingante āñōmīni tōmengā wæætē, Wadāni mīnitō imīnite waa acædānimpa, ante mīnitō imīnite ængō cæte baī cæquingānō anguēnē.

Mōnō tōniñacā ingante apænte ānāmaī incāmōimpa

¹¹Botō tōniñamīni ēñēedāni. Mīnitō wacā ingā wacā ingā wēnæ wēnæ ante apænedāmaī iedāni. Æcānō tōmengā tōniñacā ingantedō ante wēnæ wēnæ āna ayæ tōmengā ingante, Wēnæ wēnæ cæbīpa, ante æcānō apænte āna ĩna māningā Wængonguī nānō wææ angainō incæ wēnæ wēnæ ante apænecampa. Ayæ Wængonguī nānō wææ angainō ante wēnæ wēnæ impa, ante apænte angampa. Wīi tōmengā nānō ēñēnte cæquinque Wængonguī nānō wææ angainō ante apænte angampa. Wæætē edæ, Mānīnō ante nē apænte āmo imopa, ante baī cæcampa. ¹²Wængonguī tōmenganque nānō wææ angainō ante nē angaingā ingampa. Mānōmaī beyæ tōmengā adocanque nē apænte anguingā ĩnongāimpa. Adocā pōnō cæcā beyænque, Botō æmo beyænque quēwenguīnāni, ante cædongā ingampa. Adobaī tōmengā apænte angā beyænque, Wadāni wo ewente bacædānimpa, ante cædongā ingampa. Bitō guiquēnē nē angaimi imīpa diyæ wacā ingante apænte anguēnēmi imīi.

Baānæ ate æbānō baquīi, ante Wængonguinque ēñengā

¹³Mīnitō nōwo botō imote ēñēedāni. Mīnitō nē iīmaī ante tedemīni imīnīpa. “Nōwoonæ incæ baānæ ate incæ mōnitō ĩi wadāni quēwēñōmō goquīmōni imōnīpa, ante māniñōmō godīnque adoque wadepo ĩñonte mōnitō godonte ænguinta æncæte ante cæquīmōni imōnīpa,” ante āmīni imīnīpa. ¹⁴Īñæmpa, Baānæ ate æbānō bacæimpa, ante tōmāā ēñēnāmaī imīnīpa. Cōwē quēwenguīmōmpa diyæ ēñenguīmōō. Awænæcaque owo boguīmā nænque tamōnīnque quingæ

dæ ba bai mönō quēwēnō adobai do dæ bacæimpa. ¹⁵Mīnitō guiquēnē iīmaī ante anguēnēmīni imīnīpa. “Wængongui Ao angā inīnque mōnitō quēwenguimōni imōnīpa. Ayæ Ao angā inīnque mōnitō iī waa cæquī cæcæmōnīpa.” ¹⁶Īnæmpa mīnitō, Tōmēmōnīque ānīnque cæcæmōnīpa, ante pōnēnīnque tedete quēwēnōmīni imīnīpa. Mānīnō ante tōmānō wēnæ wēnæ impa. ¹⁷Waocā, Æbānō waa impa, ante ēñengā incæte cædāmaī ingā inte māningā wēnæ wēnæ cæcā ingampa.

**Māincoo nē ēadāni nāni
pōnenguēnēnō**

5 ¹Mīnitō māincoo nē ēamīni iñōmō nōwo ēñēedāni. Mīnitō nanguī Ca ca wæedāni. Edæ, Mōnō caate wæquinque nanguī ingæimpa, ante tedecōnīnque Ca ca wæcæmīnīpa. ²Mīnitō māincoo ēadincoo do wote batimpa. Ayæ mīnitō waēmoncoo tōmancoo cayæ ade cænīpa. ³Mīnitō oodo tōnō padata tæinta to tamōnīnque bai batimpa. Mānīi to tamōnī beyæ mīni wēnæ wēnæ cædinō edonque pōnī odōmonte ingæimpa. Ayæ quīncoomē gonga bæcodōñōmō concædinque æmæwo gonte ba bai mīnitō iī to tamōnī beyæ mīni baō incæ adobai æmæwo gonte ba bai bacæimpa. Īnæmpa iīmæca wodo iīnque bayedē incæ tōmēmīni māincoo ēadincoo do wote baquincoo gæte da wente cæmīnipææ.

⁴Aedāni. Wadāni edæ tōmēmīni quēwēncodenco cædināni iñōnānite mīnitō, Paga, ante mīni godonguēnenta pæ gompodīnque godōnāmaī imīnitapa. Īnīnque ænāmaī ināni mīnitō imīnitedō ante pīinte wædinque, Nē ēadāni iñōmō, Mōnitō cædinō beyæ ante dicæ pōnōnāni æntamōniyaa, ante wædōnānīpa. Mōnō Awēnē nē adocanque Tōmāā Cægāingā iñōmō nē cædināni nāni wædinō do ēñēningā ingampa. ⁵Iīmæca quēwēñedē mīnitō quīncoo waēmoncoo tōmancoo mante quēwēmīni inte mīnitō cōwē, Nāmā mōnī watapæ tote quēwēngæimpa, ante

quēwēnīmīni imīnīpa. Waocā nānō wænongā wænguīōnæ iñonte cæningā nānō wænguīnque oguīmo pōnī ba bai mīnitō cæningā bai adobai oguīmo pōnī bamīni imīnitapa tōō. Mānīōnæ edæ do batimpa. ⁶Wadāni nō cæte quēwēnāni mīnitō imīnīte Baa ānāmaī iñōnānite mīnitō iñōmō, Mīni pante wæquinque wēnæ wēnæ cædānīpa, ante wapiticæ apænte āmīni inte tōmēnāni inānite wænōmīni wænānitapa.

**Mōnō ee cæpāmo ayæ Wængongui
ingante mōnō apænedō**

⁷Mānōmaī beyæ botō tōnīñamīni ēñēedāni. Mīnitō mōnō Awēnē nānō ponguinganca ante wæntædāmaī inte ee cæte wānō cōnōedāni. Aedāni, Nē quiyacā tōmēmō wæænte ate onguīpo cōñe ba ate, Tā bocate pæquī, ante cōōnæ tedænque ee ongongampa. Cōōnæ tedæ iīnque baganca amiña bayedē waēmō pōnī nānō tōmēmoncoo tā pete gæcæte ante wīi ee ongongantawo. ⁸Mōnō Awēnē nānō ponguīōnæ oo pōnī impa, ante mīnitō adobai ee cæte wānō cōnōedāni.

⁹Botō tōnīñamīni ēñēedāni. Mīnitō wacā ingā wacā ingā wæætedō wæætē, Wīwa cæcampa, ante godō ānāmaī iedāni. Mīnitō mānōmaī cæmīni iīnque Wængongui wæætē mīnitō imīnīte apænte ante pāmaingampa. Edæ mōnō Apænte Anguīngā oo poncæcāimpa cæmīnīi. ¹⁰Botō tōnīñamīni ēñēedāni. Wēēñēedē Wængongui beyæ nē apænegaīnāni iñōmō tōmēngā ēmōwo apænēdinque wæwēnāni incæte wæntædāmaī inte ee cæte quēwēngadānīpa, ante pōnēnīnque mīnitō tōmēnāni nāni cægāi bai adobai cæedāni. ¹¹Wadāni wæwēnāni incæte wæntæye ināmaī inte ee cædāni iīnque nāni toquinque impa, ante mōnō pōnēnō ante do ēñēmīnīpa. Docā Coba wodi iñōmō tōmēngā nanguī pōnī wæwēngā incæte wæntædāmaī inte pīināmaī ingacāimpa. Mānīnō ante do ēñēnīmīni inte ayæ tōmēngā nānō wæwēñedē iīnque ba ate Wængongui

æbänö tömengä ingante nangui godongä ængaingä ingacäimpa, ante adobaï ëñëminitawo. Edæ waodäni wæwënäni iñönänite monö Awënë Wængongui ædæmö waadete waa cædongä ingampa.

¹²Botö tönñamini ëñëedäni. Wadö mini pönëno ante pönömenque pönëninque minitö iïmai ante godömenque pönëedäni. Minitö äno näwangä impa, ante wadäni pönencädänimpa, ante cædinque, Botö äno nöingä baquinö angüenë, ante änaïmaï iedäni. Edæ, Öönæ beyænque imæca beyænque quiëmë beyænque monö apænemönö näwangä baquinö angüenë, ante tömänö ante edæ apænëdämaï iedäni. Minitö wæætë Ao äinëmini inte “Ao” ante mäninque äedäni. Ayæ minitö Baa äinëmini inte “Baa” ante mäninque äedäni. Edæ wii mänömaï cæmini ininque Wængongui wæætë minitö iminite apænte ante pämaingampa.

¹³Minitö wæwëmïni ininque Wængongui ingante apænëquënëmini iminipa. Minitö watapæ tomini ininque Wængongui ingante, Bitö tæiyæ waëmö imidö angüenë, ante ämotamini ancæminimpa. ¹⁴Æcänö minitö weca wënæ wënæ ina iñömö tömengä Codito ingante mini godongämæ pönencabo iñöminite në aadäni näni Picæncabo mini änäni inänite, Pöedäni, ante aa pequënengä ingampa. Aa pecä pönäni ate tömënäni Awënë Itota ëmowo ante apænëdinque wædænque ogui wapæ æninque në wënæ wënæ inongä ingante oo paacädänimpa. Ayæ adoyedë wënæ wënæ inongä ingante näni oo paayedë tömengä beyæ ante Wængongui ingante apænecädänimpa. ¹⁵Ayæ, Wængongui ingante apænëyömonte tömengä ëñengampa, ante wede pönëninque apænemö beyænque waocä në wënæ wënæ iningä incæ edæ gancaë

bacæcäimpa. Wængongui tömengä ingante pönö cæcä ate waa ba näni ömæmoncæcäimpa. Ayæ adocä nänö wënæ wënæ cædinö beyæ wënæ wënæ ingä ininque Wængongui tömengä nänö wënæ wënæ cædinö adinque ñimpo cæcä quëwëmaingampa. ¹⁶Mänömaï beyæ minitö wacä ingante wacä ingante apænëdinque, Botö wiwa cædimö inte wæbopa, ante äedäni. Mänömaï cædinque minitö, Gancaë bacæmönimpa, ante wacä beyæ ante wacä beyæ ante Wængongui ingante apænëedäni. Waocä në nö cæte quëwënogä iñömö Wængongui ingante apænëdinque edæ tæi piñænte apænecä ingampa. Mäningä nänö apænëdö beyænque Wængongui cæcæcäimpa. ¹⁷Ediya wodi mönö waomö imö bai tömengä adobaï ingacäimpa. Incæte tömengä Wængongui ingante, Cöönæ ämi cædämaï ingäëimpa, ante ædæmö apænecä ate mëa go adoque tæcæ wadepo ganca edæ cöönæ cædämaï ingatimpa. ¹⁸Ayæ ate tömengä, Cöönæ ämi cæcäëimpa, ante Wængongui ingante wæætë apænëgacäimpa. Apænecä ate öönädë inö wææ cöönæ cægatimpa. Cöönæ wææ cæ ate onguipoga tömëmö do tä bocate pægatimpa.

¹⁹Botö tönñamini ëñëedäni. Minitö weca æcämenque nö taadö oda cæte gocä adinque wacä tömengä ingante ocæ ëmænte mämongä pongüenengä ingampa. ²⁰Iïmai pönëedäni. Në wënæ wënæ cæcä wapiticæ taadö gocä adinque æcämenque tömengä ingante nö taadö inö ocæ ëmænte në mämongä ingäa tömengä mämongä beyænque në wapiticæ gocä iñömö æmäëwo nänö wænguënëno ñimpo cæte edæ quëwencæcäimpa. Ayæ nangui pönï nänö wënæ wënæ cædinö incæ wadæ cæte ingäëimpa, ämopa. Mäninque ante yewämömopa.